

📺 Gaurav Gogoi on Angel Chakma Case 'People from Northeast Are also Indians' | IMN Indi...

Yeh hain Congress ke MP Gaurav Gogoi. Aur mera sawaal yeh hai ki esa kya ho gaya jo inko 2025 mein yeh bolna pada? Matlab kya aaj se pehle Northeast ke log Indians nahi the? Ya phir kuch log unhe Indian maante hi nahi? Aur agar maante hain, toh phir esa kya hua ki ek elected MP ko publicly yeh clarify karna pada?

Dekho bhai, ek baat toh hai ki jab koi MP press conference mein yeh kehta hai ki "hum Indians hain, Chinese nahi," toh samajhna chahiye ki iske peeche koi badi problem hai. Koi badi tragedy hui hai ya kuch esa hua hai jo iss statement ko zaruri bana raha hai. Aur yeh statement akela nahi hai. Iske saath aur bhi kuch shocking facts jude hue hain jo main aaj tumhe batane wala hun.

Dekha jaye toh yeh ek pattern ka hissa hai jo kai saalon se chal raha hai. Ek esa system jo officially kabhi acknowledge nahi hota. Ek discrimination hai jisko hum ignore karte aa rahe hain. Aur isi liye 2025 mein, yaani azaadi ke 78 saal baad bhi, hume yeh bolna pad raha hai ki "Northeast ke log Indians hain."

Toh is video mein main tumhe bataunga ki Northeast India ke log, jo India ke sabse patriotic citizens mein se hain, jinka India ke liye bohot bada contribution raha hai, jinke poorvaj is desh ke liye apni jaan tak de gaye, aur jinke log aaj bhi humare India ke border ko defend kar rahe hain, unke saath India mein kya ho raha hai. Main tumhe bataunga ki kyun Northeast ke logon ko apne hi desh mein "Chinese" bula diya jaata hai. Kyun police unke cases ko aaj bhi lightly leti hai. Aur sabse important, kyun 2014 se lekar 2025 tak, committee banne ke baad bhi, recommendations aur promises hone ke baad bhi, kuch nahi badla.

Toh doston, yeh video kuch logon ke liye shayad thodi uncomfortable ho, par main tumse bolna chahunga ki video ko end tak zaroor dekhna. Kyunki yeh karna zaruri hai. Aur agar aaj hum is problem ko ignore karenge, toh kal yeh aur zyada badi tragedy banke dekhne ko milegi. Aur tab yeh kehne ka koi fayda nahi hoga ki "humein pata nahi tha."

December 9, 2025. Dehradun ke Selakui area mein roz ki tarah din shuru hota hai. Angel Chakma aur uska chhota bhai Michael market jaate hain grocery shopping karne. Lekin wahan ke kuch local ladke unhe dekh ke, "Chinese," "Momos," "Chinky," aur "Nepali" bolne lagte hain. Yeh sunke Angel unhe rokta hai aur bolta hai, "Hum Chinese nahi hain. Hum bhi Indians hain."

Aur isse un 6 ladkon ka esa ego hurt hota hai ki woh bina kuch soche samjhe [knife aur metal rod leke Angel aur uske bhai par attack kar dete hain](#). Michael ke sir pe metal rod se maarte hain. Aur Angel? Usse toh knife se itna maara ki uski spinal cord mein injury ho gayi. Aur attack ke baad bhaag gaye.

Logon ne turant Angel ko ICU mein admit karwaya. Uske chhote bhai ne father Tarun Chakma ko call kara, jo BSF mein on duty the, Manipur mein. Woh fataafat Dehradun pahunche. Aur ICU mein apne bete ki esi halat unse dekhi nahi gayi. Aur [Tarun Chakma ne bataya ki kaise Uttarakhand Police is poore matter ko "chhota-mota" batake FIR likhne se mana kar rahi thi](#).

Yeh attack Angel par hua tha 9 December ko. Aur jab wahan ke students ne iske khilaaf protest chaalu kiya, aur dabav banaya, tab jaake police ne unki FIR likhi. Par tab tak, case ka main accused Yagya Awasthi, jo ek Nepali nationalist hai, Nepal bhag chuka tha. Aur December 26 ko, yaani attack se theek 17 din baad, ek organ failure ki wajah se Angel Chakma ki maut ho jaati hai. Ek 24 saal ka ladka. MBA student. BSF officer ka beta. Sirf isliye mara gaya kyunki usne apni nationality ke liye awaaz uthai.

Lekin isse bhi zada shocking baat yeh hai ki, Dehradun SSP Ajay Singh ne ek public statement di aur usme woh kya bol rahe hain aap khud sun lijiye,

🔴 Angel Chakma Murder Case: चकमा हत्याकांड पर क्या बोले Dehradun SSP Ajay Singh? | Man...
[Only use: 1:47-1:56 as a clip]

Matlab bhai inke hisaab se knife attack majak ho sakta hai. Kisi ki jaan chali jana bhi majak ho sakta hai. Toh ek baat batao, agar yeh mazak hai, toh racism ki definition hai kya?

Aur main bata raha hun ki yeh sirf Dehradun police ki problem nahi hai. Yeh ek pattern hai. Aur ese kitne aur cases mein yahi sunne ko milta hai ki police ne action nahi liya. Aur aaj 2025 mein bhi same story repeat hoti aa rahi hai. Kyunki system mein koi accountability, koi sensitivity, ya political will hai hi nahi isko theek karne ki.

Chaliye ab thoda peeche chalte hain. [January 29, 2014. Delhi ka Lajpat Nagar market. Nido Tania, ek 20 saal ka ladka, Arunachal Pradesh MLA ka beta.](#) Woh ek sweet shop pe jata hai address poochhne ke liye. Bas itna sa kaam. Lekin wahan ka shopkeeper, uske hairstyle ka mazaak udane laga, aur uske uppar kuch comments karne laga. Nido ne protest kiya, jisse shopkeeper ka ego hurt ho gaya aur usne Nido ko bohot be-rehmi se maara. [Police aayi bhi, lekin unhone kiya kya? Compromise karwake dono sides ko ghar bhej diya.](#) Aur agle hi din, Nido ki body mili. Jiski lung aur brain injuries se death ho gayi thi.

Phir shuru hua wahi drama jo har tragedy ke baad hota hai. [Protests hue](#), neta aaye, "Justice for Nido" trend karne laga, aur government ne [Bezbaruah Committee bana di](#). Jisme MP Bezbaruah ko head banaya gaya investigation karne ke liye.

Aur [July 2014 mein Bezbaruah Committee ne 80 page ki ek report submit kar di](#). Jisme unhone 800 se zada logon se baat ki thi. Aur unhone usme saare problems document kiye daily discrimination, sexual harassment, verbal abuse, aur police apathy, se related sab kuch. Aur phir recommendations di ki, IPC mein Section 153C aur 509A add karo racist crimes ke liye, fast-track courts banao, metro cities mein Northeast Special Police Units banao, school syllabus mein Northeast ki history include karo, aur police ko sensitisation training do.

Now fast-forward to 2025. 11 saal ho gaye us report ko. Par Section 153C aaj bhi pending pada hai. Fast-track courts? Kabhi bane hi nahi. Anti-discrimination law? Aaya hi nahi. Aur Police training bhi buss nam ki rahi. Jiska result aaj hume Angel Chakma ke case mein dekhne ko mil gaya hai.

Ab dekho bhai, isme ek pattern samajhne ki zaroorat hai. 2014 mein Nido Tania ka murder hua, committee bani. [2020 mein COVID period mein 22 documented cases hue sirf 6 hafta mein.](#) Aur ab 2025 mein Angel Chakma ka murder ho gaya. Matlab pehle Death hui, phir usse thoda Outrage hua, Committee ban gayi, aur dheere dheere mamla shant ho gaya, aur phir kuch saal baad dobara yeh cycle repeat hoti hai. Aur yeh cycle saalon se chalti aa rahi hai, par koi action nahi hota.

Ab aate hain March 2020 mein. Jab Covid lockdown laga hi tha. Poora India ghar mein band tha. Aur Northeast ke log? Unke liye ek aur lockdown tha, racism ka lockdown. [Rights and Risks Analysis Group \(RRAG\) ki report ke according February se March tak, matlab sirf 6 hafta mein, 22 documented cases aaye racial discrimination ke. Aur yeh sirf reported cases hain.](#)

Par mera sawaal hai ki achanak esa hua kya? Delhi mein [Manipur ki ek aurat ko "Corona" bulaya gaya, aur uske muh par thook diya](#) gaya. [Kolkata mein students ke ghar pe mob attack](#) kar diya. [Hyderabad mein northeast logon ki store mein entry deny](#) kardi. Mysore mein [Nagaland ke students ko grocery store mein jaane nahi diya. Aadhaar card](#) dikhane ke baad bhi. Yeh dekhiye unka [video](#), aur zara sochiye agar koi aapke saath esa karta toh aap kya karte. Aur itna hi nahi, [Siliguri mein ek nurse ko, jo frontline worker thi COVID ke against, usse apne hi ghar mein jaane nahi diya](#) gaya, yeh bol kar ki wahi corona faila rahi hai. Yeh [dekhiye](#). Matlab kitni sharm ki baat hai.

Aur iske regarding, [North East Support Centre ki Alana Golmei ne bataya ki, unke liye 1-2 cases per week handle karna toh normal hain. Par COVID ke time yeh number 4-5 calls per day tak chla gya tha.](#) Aur jisme se 60% complaints women ke the. Aur yeh sirf simple discrimination nahi tha.

In fact, [Tata Institute Mumbai](#), aur [Delhi University](#) jaise prestigious institutions mein bhi yeh chal raha tha. COVID ne toh sirf isse trigger kiya, but racism toh pehle se hi humare andar bhara tha.

Aur ispe government response? [March 2020 ko Ministry of Home Affairs ne ek advisory issue ki yeh kehte hue ki, "Northeast ke logon ko harass mat karo."](#) Bas. Koi enforcement nahi, koi accountability nahi, sirf kaagzi karvai. Socho zara, jab India ko sabse zyada unity chahiye thi, tab hum apne hi citizens ko "Chinese" bula rahe the, virus failane wale ki tarah treat kar rahe the.

Aur main janta hun ki aap mein se kai logon ke dimag mein sawaal aa raha hoga ki, Northeast ke logon ne India ke liye kiya kya hai? Toh chalo main tumko yeh batata hoon.

Jab India ki azaadi ki baat hoti hai toh Gandhi, Nehru, Bose yaad aate hain. Lekin Northeast ke freedom fighters ko toh school books mein sirf ek-do line mili, aur national narrative mein toh woh bhi nahi mila.

Par the bhai.

[Rani Gaidinliu](#) ne 13 saal ki umar mein Britishers ke khilaf awaaz uthai thi, jiske liye unhe matr 16 saal ki umar mein life imprisonment mila tha. Aur Jawaharlal Nehru jab unse milne gaye jail mein toh unse mil kar unhone unko "Rani" ka title diya.

Ese hi [Kanaklata Barua](#) aur [Bhogeshwari Pukhnani](#) 17-18 saal ki do ladkiyan, jo Quit India Movement mein tiranga leke nikli, par Britishers ne goli maar di.

[Bir Tikendrajit Singh](#). Manipur ke "Lion" kehlaye jaate the, jo Anglo-Manipur War mein shaheed hue.

Inke alawa [U Kiang Nangbah](#), [Kushal Konwar](#) aur ese kitne aur naam hain jo azaadi ke liye shaheed hue. Par aaj kitne hi logon ko pata hai?

Aur sirf freedom struggle mein hi nahi. [World War 2 ke time pe. Jab Japan ne India pe attack kiya tha, Burma ke through.](#) Tab Northeast India ki zameen khoon se lat-pat ho gayi thi. Aur us time par bhi Northeast ke logon ne bina dare unse lada tha. Lekin school books mein kitne pages hain jahan yeh padhaya jata hai, 2-3, aur woh bhi shayad.

Ab aate hain defence forces pe. Abhi Angel Chakma ka jo case hua uska toh aapko pata hi hoga, uske father kaun the? BSF Head Constable. Matlab Border Security Force. Jo India-Bangladesh border pe duty karte hain woh. Aur ese northeast ke kitne aur log BSF mein hain, Assam Rifles mein hain, paramilitary forces mein hain? Kyun hain? Kyunki woh border states hain.

China border, Myanmar border, Bangladesh border par India ka first line of defence kaun hai? Yahi Northeast ke log. Aur jab Pakistan se tension hoti hai, Kashmir ki kuch baat hoti hai. Jab China se tension hoti hai, ya Arunachal ki koi baat hoti hai. Toh Northeast hi hai jo hamesha India ke defence mein aage raha hai.

Exact army percentage population ke hisaab se kam ho sakta hai, yeh sach hai. Lekin border security mein, special forces mein, aur paramilitary mein inka contribution hum ese hi nahi jaane de sakte. Aur yeh sirf numbers nahi hain, yeh sacrifice hai unka, aur yahi asli patriotism hai.

Aap khud ek baar socho zara jiske father ne apni puri zindagi border pe service di, desh ke liye. Unka beta bazaar se sabzi khareed-te waqt "Chinese" bol kar maar diya gaya.

In fact, dekha jaye toh [Northeast ke log hum logon se zada polite aur calm rehte hain. Aur isi liye unka Crime rate humare se humesha kam rehta hai.](#) Aur unka contribution highest.

Aur ese kai criterias hain jisme Northeast ke log humse aage hain fir chahe woh patriotism mein ho, hospitality mein ho, ya aur kisi cheez mein.

Aur example ke liye bata dun ki, [Mary Kom boxing](#) champion, [Mirabai Chanu Olympic](#) medalist, aur [Hima Das track star](#) sab northeastern hi hain.

Toh ek baat toh humko maani padegi ki Northeast ne India ko bohot kuch diya hai. Freedom fighters diye hain, soldiers diye hain, athletes, artists, workers diye hain. Par badle mein unhe kya mila hai? Iski baat main ab karunga.

Northeast ke log daily basis pe kya face karte hain? Ek report ke according [Delhi mein 54% Northeast logon ko discrimination face karna padta hai. In fact, 10 mein se 7 logon ne khud ko unsafe bataya hai.](#) Aur [women ke case mein woh 67% discrimination face karti hain.](#) Matlab

Northeast ke logon ko apne hi desh mein ghar dhoondhne ke liye discrimination face karna padta hai. Landlords mana kar dete hain. Jabki unke paas is desh ki citizenship hai, voting rights hain, passport hai, par ghar nahi milega kyunki chehra alag hai.

Aur yeh toh ho gayi aam janta ki baat, kuch logon ne toh politicians ko bhi nahi chhoda. Yeh dekhiye ek incident jo Gaurav Gogoi ne khud camera par btaya hai, <https://youtube.com/shorts/DT68p-3jqOo?si=PQ3WoZ2UJ4BKjrul> Matlab hum toh aam janta ki baat kar rahe the, yahan MP ko yeh sab sunna pad raha hai. Toh socho normal Northeast student ko kitni baar yeh sab face karna padta hoga.

Ab finally aate hain policy pe. 2014 mein jo Bezbaruah Committee bani thi. 11 saal ho gaye usko. Par implementation kya hua? Section 153C, 509A aaj bhi pending hain. Criminal Law Amendment Bill 2015 se fase hue hain. Anti-discrimination law exist hi nahi karte. Fast-track courts, nahi bane. Delhi mein phir bhi SPUNER ban gya, matlab northeast ke logon ke liye special force, par baaki cities mein woh bhi nahi.

Aur iske bawjood humare [Union Minister Kiren Rijiju ne 2018 mein claim kiya ki, "Most recommendations are implemented."](#) Lekin 2025 mein Angel Chakma ki maut, us implementation aur reality ka gap saaf-saaf dikha rahi hai. In fact, [2017 mein ek Monitoring Committee bhi bani thi, Bezbaruah ko track karne ke liye](#), usme bhi meetings hoti rahi, par outcome kuch nahi nikla. Aur yeh toh chhodiye, government ke paas exact data hi nahi hai ki kitne hate crimes hue. Criminal records mein racial violence ki koi separate category hi nahi hai.

Aur toh aur India ne [1968 mein ICERD approve kiya](#) tha. Aur [convention kehta hai ki racial discrimination eliminate karo, aur uske liye proper laws banao](#). Par aaj 57 saal ho gaye usko. India ne usse sign bhi kiya, but implement nahi kiya. Aur wahin baaki countries ko dekho, toh [South Africa, UK, US, Canada](#) sabne anti-discrimination frameworks bana liye hain. Par India? Duniya ki largest democracy, unity in diversity ka naara lagane wali, aur 4th largest economy kehlane wali country ke paas [anti-discrimination law nahi hai](#). Kyunki political will nahi. Kyunki yeh issue vote bank politics mein fit nahi hota.

Aur yeh sirf Delhi, Dehradun ki kahani nahi hai. Mumbai, Pune, Hyderabad, Chennai, har metro city mein yeh hota hai. India ka Northeast discrimination sirf social issue nahi. Yeh constitutional failure hai. Moral failure hai. Humanitarian failure hai.

Aur jab tum apne hi citizens ko foreigner ki tarah treat karte ho, unki identity ko deny karte ho, unke contribution ko ignore karte ho, toh tum nation building nahi, division create kar rahe ho.

We are Indians. Hum sab Indians hain. Phir chahe Mongoloid features hon, Dravidian hon, ya Aryan hon. India mein 2,000 se zada ethnic groups hain, aur 1,600 se zada languages hain. Yahi humari diversity hai, strength hai. Lekin tab tak jab tak hum ek doosre ko accept karein, respect karein, unhe protect karein. Aur iske liye certificate ki zaroorat nahi honi chahiye, aur na hi kisi ko chehra dekh ke judge karna chahiye.

Aur agar 2025 mein bhi yeh prove karna pad raha hai ki Northeast ke log Indians hain, toh problem poore India ki hai, sirf Northeast ki nahi. Problem system ki hai, victims ki nahi. Problem political will ki hai, public awareness ki nahi.

Toh ab tumhe kya lagta hai? Kya India mein kabhi anti-discrimination law banega? Kya Northeast ke log kabhi safe feel karenge? Kya Angel Chakma ki maut kuch badlegi? Ya phir yeh bhi ek aur statistic ban jayega?

Comments mein zaroor batana. Aur agar yeh video impactful lagi, toh share karna. Kyunki Angel ki awaaz ko sunna bohot zaroori hai. Aur racism against Northeast Indians must stop.

Aur jaate-jaate buss yahi kahunga, We are Indians. Remember that. Respect that. And Protect that.